



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:

30 грошей місячно,
80 „ квартално,
1.50 „ полрочно,
3 зл. рочно.

В Америкі: 1 дол. рочно.

В Чехословакии:
2 кор. місячно, 10 кор. полрочно,
20 кор. рочно.

Ціны оголошень:

Ціла сторона 120 зл., $\frac{1}{2}$ сторони 60 зл., $\frac{1}{4}$ сторони 35 зл., $\frac{1}{8}$ стор. 20 зл., $\frac{1}{16}$ стор. 10 зл.; оголошення малы за 1 мм. 20 гр., в тексті 30 гр., перед текстом 40 гр. При місячном и долгом оголошеню значна знижка.

Контото чекове Нр. 404.155.

Пекуча потреба.

В послідних літах росне число учачой ся сельской молодежи. Наши селяне зрозуміли, же грунту уж дальше ділити не можна и кто лем може, посылат сына до школы, штобы он глядал погодивше хліба в місті. Причинило ся до того в великой мірі користне для селян заряджене премера ген. Славой-Складковського, накладаюче на заряды гминны обовязок давати стипендии бідной и талантливой сельской молодежи. Помоч то велика, бо гминный стипендыста не лем достае грошеву поддержку с заряду гминного, котра ест ему потребна на оплату помешканя и удержаня в місті, але также ест звольнений от оплаты таксы зн науку в школах.

Тота помоч бідным родичам, отдаючим свои діти до школы, а также охота многих родичей придбати лучшу будучность своим дітям, стали ся причиною, же с каждым роком прибыват учачой ся сельской молодежи.

Але разом с тым потішаючим явленем стае перед нами пекуча потреба обезпечити опеку и допомочи морально и материяльно учачой ся молодежи. До тепер лем в одних Горлицах маме руску бурсу, котра дае помещене, удержане и помоч в науці, а в інших містах бракуе нам осередка, лучачого молодеж находячу ся в школах. Горлицка бурса не може помістити всіх, якы горнут ся до ней, бо мае помещене всього лем на 40 воспитанников. Зрештом хоц бы ся и розбудовало помещене бурсы, то и так не розвязало бы ся той болячки, бо в Горлицах ест мало школ. Ест там гимназия о ограниченном числі учеников, в виду чого многы ученикы, хоц здают экзамен до той гимназии, не могут быти приняты, бо ніт місца. Крім гимназии ест в Горлицах лем 7-клясова школа народна и где-якы школы для дівчат, котры для нас не мають великого значеня, бо селяне рідко посылают дівчата до высших школ.

В школьницті ест припис, же до каждой гимназии принимат ся в першой мірі учеников, походячих с даного повіта, в горлицку гимназию отже принимают учеников, походячих с повіта горлицкого, а с інших повітов лем втотчас, коли ест ище місце в гдеякой клясі. Тот припис сильно утруднят посылане дітей через наших селян до школы. Селяне с інших повітов не могут посылати своих дітей до гимназии в Горлицах, бо там не

хотят их принять, не могут их посылати также в своих повітовых містах, бо там ніт бурсы, а на удержане дітей по приватных станциях селян не стати.

Штобы тото утруднене усунути, треба конче старати ся у міродательных школьных еластей о выдане порученя, штобы гимназия в Горлицах принимала всіх учеников, походячих с Лемковщины, без взгляду на тото, с якого повіта походят. Таким способом была бы частично розвязана справа тых хлопских сынов, котры хотят ходити до гимназии.

Але не всі будут ходити до гимназии. Тепер ест основаных так дуже рижных фаховых школ, же пораднійше ест для хлопа отдати своего сына до школы фаховой, бо и коротше треват наука и скорше можна дождати ся фалатка хліба. А в Горлицах таких школ ніт. Ніт там ани школ фаховых, ани школ высших, крім одного лиця клясычного. Отже по сконченю гимназии хлопец мусит записати ся до школы в иншом місті, где остае без моральной и материяльной помочи. Часто сут случаи, же абсолювент гимназии с браку средств остае дома и марнуе ся. С тых причин отже мусит ся в скором часі утворити бурсы в других містах, а передовсем в одном великом місті, где сут всіякы школы. Найблизшим для Лемковщины таким великим містом ест Краков. В Кракові студийое на университети много молодежи с Лемковщины. Тота мо-

В справі торговлі рогатым скотом.

В справі торговлі рогатым скотом приговорила Рада Министров важный законопроект, котрый передала уж на обрады Сойма. Ведля того законопроект министр рольництва мае право реестровати тоты особы, якы занимают ся торговльом рогатого скота, а также зарядити, кто може купчити статком.

На основі того законопроекта будут мати право купченя рогатым статком рольны продуценты (тоты, котры ховают статок — отже хлопы), або запряжены гандляры и рольны организации.

Новый законопроект, если его Сойм ухвалит, буде мати велике значене. Он даст

лодеж не мае своего осередка, жие по приватных станциях и часто тяжко бідуе. Крім того в Кракові ест много рижнораких школ. Сут там школы майстров, сут школы техничны, ремесельничи, промысловы и торговельны, молодеж отже найде много новых возможностей науки. В бурсі в Кракові, в отдельном помещеню могли бы найти приют также богословы, котры тепер жиют на коморстві в ченстоховском семинарі.

Справа основаня такой бурсы в Кракові не ест знова так тяжка. По програном процесі о маеток санецкой бурсы, мае тота бурса в судовом депозиті зложеных около 30 тысяч злотых и гроши тоты могут быти подняты в каждый момент. Предсідатель санецкой бурсы Всч. О. Роман Прислопский мае в найблизшом часі скликати загальне собрание членов той бурсы, котре рішит, на што обернути тоты гроши. Горлицка бурса мае прекрасны парцели, котры можна бы также на тоту ціль продати. С поважным датком выступила бы напевно Апостольска Администрация для Лемковщины (мала бы приют для своих богословов), штоси собрало бы ся жертвами у нас в краю и в Америкі и на початок можна бы было побудовати дом для яких 50 воспитанников.

Справу тоту уважают многы за барз пекучу, о ней говорило ся нераз на сходках и товариских собраниях и всі признают, же бурса в Кракові могла бы отдати великы услуги учачой ся хлопской молодежи. Рушаме тоту справу публично и просиме присылати редакции свои погляды в той справі.

властям полне право рішати, кто може и кто не може купчити рогатом худобом. В силу того законопроекта не буде конкуренции, а тото може обнижити ціну худобы.

В Чехах чим раз меньше людей.

Природный прирост населеня в Чехословакии представлят ся чим раз планьше. В р. 1925. прирост людей выносил 11 процент, а в р. 1937 всього лем 4 процент. Если бы прирост людей маліл так дальше, то в коротком часі дойде до того, же людей в Чехословакии буде с каждым роком меньше, што грозило бы державі великом опасностью.

Обкроеный бюджет на школьництво.

Державный бюджет школьный на р. 1938-39. предвиджал надане 4000 новых учительских посад. Ест того конче потребне, бо класы сут забиты школярами и при таком числі дітей не може быти бесіды о нормальной науці. Брак школьных салы и учительских сил стал ся причином, же много дітей не ходит до школы або цілком, або ходит лем барз корот-

ко и не кончит их. И одны и другы остают безграмотныма и число тых, яки не уміют ани читати ани писати, ест в краю застрашаючо велике.

Тымчасом оказуе ся, же Министерство Школьных Справ с рижных причин буде могло надати в найближшом році лем 1700 новых етапов школьных.

Безбожництво в Німеччині.

Гитлер чим раз енергичнійше выступат против религии так католицкой, як и протестантской. На місце тых религии хоче он дати німецкому населеню свою гитлеровско-німецку религию, в котрой крест замінят на свастику, библию — на книжку написану Гитлером под назвом „Мейн Кампф“ (моя борба) и т. д. Змінил он также всі религийны обряды и так: крещене отбыват ся в тот способ, же отец повинен протягнути руку ку книжці „Мейн Кампф“, на котрой лежит голый меч и зложити слідууючу присягу: „присігам перед Богом, што я, отец дітяти и его мати — есме арийского (нежидовского) походження. Присігам и обіцюю выховати дітя в німецком духу для добра німецкого народа“.

Уложено там также гитлеровске: „Вірую“. Оно так звучит: „Вірую в вічного Бога, котрый отроджат ся в твореню истории народа. Вірую в Исуса Христа, Великого Борца. Вірую в німецку отчину — Боже обявлено. Вірую в всяту нашу Матер, котром ест німецка отчина. Не вірую в римского папу, ани в евангелицких папов, т. е. протестантских епископов. Вірую со всіх сил и с цілой души в нашого Фюрера Адольфа Гитлера в его побіду, в его твореня для добра нашой матери отчины, ведля Божой волі“.

Так то в Німеччині вмісто перед Всевышним зачинают корити ся перед своим німецким божком Гитлером. Вертают стары поганскы часы.

Спис маєтку жидовского.

Гитлеровскы власти выдали заряджене, завзываюче всіх жидов, яки живут в Німеччині, до зголошеня своего маєтку до дня 1. липня. Жиды мают зголосити не лем свои дома, землю и капиталы, але также и всякого рода дорогоценности. Официально подають, же опис маєтку, находячого ся у жидов, робит ся по тото, штобы німецке правительство могло в разі потреби выкористати жидовскы маєтки для народного господарства.

Гебельс заявил, же в коротком часі прийме ся радыкальны міры для закрытя всіх жидовских склепов в Німеччині.

В Німеччині не крыют ся власти с тым, же хотіли бы позбыти ся жидов в як найскор-

шом часі. „Нюс Кроникль“ подае, же раситовскы власти завозвали до себе руководителей жидовской общины в Берлині и запытали ся их, чи они могут дати гваранцию, же в найближших місяцах выйде с Німеччины што найменше 40 тысяч жидов. Жиды отвітили, же если бы позволить жидам забрати с собом их маєток, то напевно таке число жидов выйде. Власти на тото заявили: „ні, мы тото зробиме простійшим способом“.

В пару дней позднійше в Берлині распочали ся всякого рода безчинства, котры перешли в нищене и розбиване жидовских склепов.

Опасность войны меже Франциом и Японим.

Францускы войска заняли группу островов Парацель недалеко Наинан на Океані Спокойном. Вість о том занятю выкликала безпокойство в политичных кругах японских. Японске министерство выдало заряджене, штобы японска фльота контрольовала всі чужи пароходы, ідучи в сторону тых островов и штобы не цофнула ся перед обезоруженем войск, чужих держав, стремячих до окупации головного острова Гаинан.

Японска декларация вытворят барз небезпечне положене на Далеком Выході и грозит конфликтом военным меже Японим и Франциом.

Заняте островов Парацель, котры становят добру базу для гидропьянов, послідовало по згоді меже англицким и французским правительством.

Японске правительство выслало острый протест до Парыжа, в котром зажадало выцофания войск французских с островов Парацель. Здае ся однак же нота японска буде отшмарена, бо Франция рішила боронити своего стану посіданя на Далеком Выході.

На водах морских коло островов Пара-

цель находит ся 20 военных французских пароходов, котры в разі потреби мают боронити французского стану посіданя на Далеком Выході.

Война в Испании.

Повстанчи войска посувають ся чим раз дальше. В послідном часі перешли они ріку Турия на фронті Теруель и заняли важны стратегичны позиции на правом берегу той рікы. Правительство войска отступили терен боя, оставляючи значны запасы военного материялу.

На фронті кастельонском повстанцы ідут успішно вперед, доходячи до рікы Сан Антонио и опановуючи місто Буррияна.

Кромі того повстанчи войска опановали горский ланцух Пунталь, где отшмарили контратаку правительственных войск.

В Редакции „Лемка” в Крыниці можна достати ріжны книжочки религиозного содержания.

Новый маршал Сойму.

По смерти Стан. Цара роблено рижны догадки, кто займе по ним почетне становиско маршала Сойма. Сойм на засіданю, отбытом дня 22. червня выбрал подавляючим большинством голосов маршалом Сойма полк. Валерия Славека, б. премера, найближшого сотрудника першого Маршала Пилсудского и одного с найвиднійших правительственных деятелей.

На становиско маршала Сойму были зголошены дві кандыдатуры, одна полк. В. Славека, друга И. Новака со Шлеска. На загальне число 176 голосов, 114 было за полк. Славеком, 30 за Новаком, а 32-ох послов отдало білы карткы.

За кандыдатуром полк. Славека голосовали также украинофилы и жиды. Факт тот поясняют собі тым, што полк. Славек николи до тепер не выступил рішительно ани против одним, ани против другим.

Кандыдатуру полк. Славека поставил ген. Желиговский, тот самый, котрый в осени выступил в Соймі в обороні констытуции. Выступали против его кандыдатуры послы з Озону с вице-маршалом Сойму Медзинским и председателем войсковой комисии Сойма посл. Екертот. Так пос. Медзинский як и пос. Екертот сут за тым, штобы змінити выборчу ордынацию до Сойму и Сенату, котрой одним с головных авторов был полк. Славек. Выбор Славека отзначат отже, же на зміну выборчей ордынации не заносит ся.

В кругах соймовых всі сут того мніня, же полк. Славек, яко маршал Сойма, буде стояти твердо на стражі констытуции и не допустит до вольной и широкой ей интерпретации.

Рывализация Німеччины с Англиом и Франциом.

Роснуча могучость німецкой державы каже Англии и Франции звертати сильну увагу на всьо, што діе ся тепер в Европі. Англия и Франция слідят точно за всіма кроками Німеччины и коли они спостерегли, што Німеччина хоче поширити свои впливы на край балканскы, рішили выступити с господарчим пляном для тых краев. Утворено в той ціли специальну англицку комисию, котра мае выхати до балканских держав и перекопати ся на місци, чи и в якой высоті можна дати пожичку тым державам и яки товары и землеплоды можна бы было от них купити.

Тоты планы Франции, а передовсем Англии выкликали в Берлині невдоволене и тревогу. Німеччина уважат полуднево-восточну часть Европы за терен своей господарчей экспансии, там хоче посылати и продавати свои промисловы товары и оттамаль хоче спроваджати землеплоды, а ту нагло входит ей кто-си инший в кашу.

Вытворила ся через тото остра рывализация меже Німеччином и Англиом и Франциом на Балканах и Близком Выході; котру заострил ище больше договор, який заключила Франция с Турциом.

Молоды лікары мусят отбыти практику на селі.

Сейм на засіданю, отбытом дня 6. т. м. принял ухвалу на основі котрой всі молоды лікары мусят отбыти кромі практыкы шпитальной также дво-літну практыку лікарску на селі. Без отбытя практыкы на селі не вольно буде лікарам выконувати своего фаху.

С Петрограда выселяют всіх чужинцов.

До Талина приїхали англичани, які заявили, що тут мусово виселені с Петрограда. Они оповідають, же в Петрограді ніт ані 1/10 части того числа чужинцов, яке было перед двома роками. Совітскы власти выселяют аж и таких, котры родили ся в Росии и не знают никакого иншого языка. Прото тыж многы не хотят вертати до своих давных родных краев и намірают поселити ся в прибалтийских державах. Выселены мусіли оставити свои маєт-

кы в Росии; позволено им вывезти лем ничтожны грошевы сумы.

Кромі того совітскы власти адміністраційны выселяют мусово людей с многих місцевостей, положеных коло Петрограда, хотячи освободити цілый тот район от непожанданных элементов.

Газеты подають, же дотепер выселено с Петрограду и его окрестности понад 350.000 людей.

Смакує украинцам рускый маєток.

(Интересный процес о уневажнене тестаменту).

Перед пару роками померла в Сяноці бл. п. Антонина Семечко, знана руска діятелька. Покойна была властительком двух домов в Сяноці. В послідных літах жита хворила покойна на склерозу. В том часі закрутила ся коло ней ей кривнячка, паннуса літ 34, — Дария Филипчак, дочка знаного украинофила, Ивана Филипчака, емерытованого учителя с Лішны коло Сянока, о котром говориме позднійше.

„Паннуса“ уміла так ходити коло „дзютуні“, маскуючи ся за руску, што покойна хвора и впроваджена в блуд, записала ей оден дом.

Панна Дария не все была украинком. В часі світової войны, яко руска, утекла до Ростова, а ей братчыкы учили ся в Петрограді. Но, идучи за своим отцом Иваном с Лішны, котры свои політычны переконання мінял

так, як кошелі — скоро по одержаню запису дому, стала ся украинком, а легко одержавши рускый маєток — легко го травит и гойнує.

Против тому запротестовала найблизша родина бл. п. Антонины Семечко и по літных судовых фериях отбуде ся в Сяноці интересный процес о уневажнене тестаменту покойной Семечко.

Родина операт ся на том, што в каждом тестаменті отгрывають ролю аргументы материяльны, моральны и суспільны. Покойна, яко руска, николи не записала бы своего маєтку украинцеви — ворогови русских, а запискала зробила лем прото, бо была впроваджена в блуд. Также со взглядов суспільных доходы с того дому повинни были служити яко помоч найблизшой бідной родині.

Дбайме о луку и пасовиска.

В сельских господарствах видит ся велике занедбане лук и пасовиск. Каждый хлоп дбає о свое орне поле и старат ся, як лем може о того, штобы мати на нем як найкрасши вроды, але если ходит о луку, то праві цілковито нима ся не интересує. Луку сут звычайно покрыты мохом и выявленны, але тото якоси не болит хлопа так, же бы хотіл тому зарадити. На луку выходит ся звычайно лем раз до року по св. Петрі, коли треба траву скосити и высушити. Пак выганят ся на луку статкы, котры не находят там ниякой паши, лем шкодят лукам, бо инша ест трава на луках, а инша на пасовисках. Трава лучна отнавлят ся по скошеню, але не любит скубана и огризана и коли соскубат ю худоба, долго не отнавлят ся. Прото тыж на луках не повинно ся пасти худобы, лем дальше их оганяти, штобы на них выросла отава. Але як же выросне на луках красна отава, если и перша трава ледво прикрыла землю?

Зрозуміла річ, же без погноєня лук и належитой управы не поправит ся покосу сіна. Даст ся однак тото зробиити при невеликом вкладі работы и выдатков на навозы, котры ся каждому вернут напевно в коротком часі.

Каждый с нас знає, же рослина до своего развития потребує воды, повітря и навозу, котрый ест кормом для рослины. Если ходит о повітрі, то не выстарчит, штобы лем листкы и надземны гоны мали его до волі, але повітре мусит доходити также до кореня каждой рослины. Прото тыж не выросне красна трава на луці подоптаной, забитой и покрытой мохом, бо до землі не може достати ся повітре. Треба отже в першой мірі очистити луку с моху и перепажити их череслами, штобы повітре мало легкий доступ до землі.

Кромі того, если мы каждого року коси-

ме траву и не навозиме луку, то она стає ся с каждым роком постнійша, земля не має в собі жадных навозовых частин, потребных до развития рослин и на таких луках може рости лем кепска остра трава, котра не має нияких кормовых вальоров для худобы. Трава добра, мягка и листяста, потребує конче навозов. Може то быти навоз стаенный, штучный або компост, — всьо одно — але навозити луку треба таксамо што пару літ, як и орне поле.

При луках навожене оплачат ся ліпше, як при орном поли, бо при луках ест меньше работы, а сіна даст добре спрогноєна лука не меньше як и орне поле. Сіно с прогноєных лук ест знаменитом нашом для худобы и не уступає нич коничови, не платиме отже за насіне, а профит маме такый самый.

Маючи добре спрогноєны луку, а тых ест в каждом селі много, будеме мати значно больше доброй паши для худобы. А што значит для хлопа паша, то каждый знає. Коровы, котры держаны тепер на соломі, ледво ногами волочат, покрасніють напевно и заплатят добре за сіно своим молоком, котрого буде и больше и оно буде маснійше и ліпше. Маючи до волі молока, зачне хлоп жити ліпше и найде дост силы до тяжкой сельской работы.

Спал перед смертю 361 дней. В Ельджині в Амерыці умер 38-літний Леонел Лейти, котрый спал без перерыва 361 дней и ночей. Лейти, як бы предчувствовал свой близкий конец, бо на пару дней перед спячком зробиит тестамент и выдал распоряджене, кто має нести его домовину и як мають его похоронити.

Перун Д.

Значенє принята христіянства на Руси.

Уж 950 літ минуло от того часу, коли наша Русь приняла віру Христову. Тото велике событе отбыло ся в р. 988, коли князем был Володимір Великий.

Приняте Христовой віры становит нову эпоху в историчном розвитку руского народу. В Києві заложено митрополию, под котру належали всі епископства цілой руской землі. Тота митрополия подчиняла ся царгородскому патриарху. Киев от того часу стал ся осередком не лем політычного, але и религийного жита. Русь остала отділена от звірского поганского жита. Она звязала ся тревалым союзом с западным христіянськым европейськым державами и под впливом тых христіянских держав развивала ся політычно. От тепер на Руси развиват ся культура, взорована на византийской. С Византии приходили священники, котры разом с Христовом віром ширили также просвіту.

За десяту часть своего маєтку Володимір Великий побудовал церков, названу „Десятинною“. Сам князь, по словам літописца, змінил свой характер по принятию христіянства. Передом, яко поганин, был он острый для своих подданных, на войні жестокий, тепер змінил ся цілковито и стал ся правдивым отцом руского народу. Народ полюбил его щиро и назвал его „красным Солнышком“, а Церков зачислила его в число святых.

* * *

Выше поміщена допись має безпорно гдеякы хыбы. Помимо того с приятностью поміщаме тоту допись, бо ей автор 15-літний школярник — доказує, же интересує ся живо историем своего народа и читат и любит тоту исторію.

Кромі того у автора ест замітний дар высказывания своих мыслей и знания на письмі. Стыль простый, будова речень правильна, кажут надіяти ся, же при дальших пробах и образованию выробит ся с молоденького автора не злый народный писатель. Прото тиж просиме присылати нам часто Ваши дописи и пробуйте писати их на рижны житевы темы наших сел.

Редакция.

Коли належит покрывати коровы.

Коли треба покрывати коровы, штобы давали они найбільше молока? Варгало бы розслідити тоту справу и переконати ся, чи час покритя коров має вплив на молочность коров, чи не має. Над том справом переведено досвіды и переконано ся, же на молочность коров впливат также и час покритя коров. Практыка выказує, же добре откормлена корова не повинна быти покрывата скорше як на 2 тыждні и позднійше як на 14 тыждней по отеліню. Если однак корова ест забіджена, то треба границу часу покритя коровы пересунути о 2 до 3 тыждней.

За скоре а также и за поздне покритя коров спричинят, же коровы дають меньше молока, а кромі того, корова не покрывата поздно по отеліню часто не хоче ся зателити.

Што чути в світі и в краю

Амерыка буде „літаючу кріпость”. В Злученых Стейтах Полночної Амерыкы в фабриці Доглеса будуть в великой тайні т. зв. „літаючу кріпость”. Ест то самолет, котрый може легко перелітати до Европы и назад без дополнения запасов бензыны.

Будова того самолета, якого ніт ище в цілом світі, даст первенство в том отношеню американской арміи. Самолет будуть в ізольованом (отособненом) ангарі, о замазаных білом фарбом окнах, до дотрого не впускают ся никого чужого. Инжинеры и роботники маюот заборонене остро оповідати о „літаючой кріпості”.

Ширина крыл „літаючой кріпості” выносит 250 футов, а вага — 160.000 фунтов. На нем легко може помістити ся 100 людей. Крім того може он забрати довольне число тягару. Таких самолетов будуть там 13.

До того часу найбільшій самолет мал крыла о ширині 150 футов и важил 60 тысяч фунтов. Торговельный самолет мае ширину 138 футов и може помістити 42 людей. Клиппер Сикорского мае 152 футов ширины и може помістити 82 людей.

Англия купуе в Америкі 400 самолетов. Англицкый министр авіацій затвердил контракт высланої до Амерыкы комісії, котра закупила там 400 самолетов-бомбовозов. Назва фабрыкы, яка мае выконати замовлене держит ся в тайні.

1300 жидов переїде с Австриї до Мексыка. Министр внутренных справ в Мексыку заявил, же 1300 жидов с Австриї найде прибіжище в Мексыку. Жиды приїдут в коротком часі до Вера Круз, где будут поділены на громады, котры поїдут в рижны закутины краю. Мексыканске правительство наділит приїхавших до Мексыка жидов земльом.

В Чехословакии продолжено войскову службу. Чехословацка рада министров ухвалила продолжити войскову службу с двох до трох літ. Через таку зміну стан чехословацкой арміи буде выносити в часі спокою 250.000 людей.

В Палестыні арештуюот жидов. Мандатовы власти арештовали в послідном часі 19 жидов, с чого 12-ох в Тель-Авив, а 7-ох в Єрусалим. В двох жидовских кварталах Єрусалима поставлено на кошт населеня полиційны постерункы.

До чого доводит пиянство. В ночи на 5. липня т. р. около години 4-ой над раном при ул. Кручой в Варшаві дали ся чути страшны крикы женщин. Як ся виявило крикы тоты походили с мешканя Марии Запала, вдовы по кундукторі трамваево, котра пранем зарабяла на жите.

Штобы легче было заплатити ей коморне за помешкане, приняла она до себе Ю. Мендляр, роботника будовляного, котрый был пияком и авантурником. Тот то Мендляр вернул дня 5. липня рано упитый до хаты и в приступі шалу порвал сокыру и поранил спячу Марию Запала.

Коли Мендляр увиділ, же всі жертвы его звірства лежат в кырви и не рушаюот ся, хопил за голяк и перерізав собі горло.

На місце злочину приїхала лікарска комісія, котра ствердила смерть Мендляр и тяжке покалічене Косецкой. Косецку, праві умеряючу и Марию Запала забрали до шпиталя. От до якого нещастя допроваджат людей горілка и пиянство.

Безпорядкы в Палестыні. Террор в Палестыні приняв в послідном часі ненотованы розміры. В Яффі и Єрусалимі от бомб и стрілов пало 24 арабов, а 15-ох ест раненых. Раненых ест также 4-ох жидов. Атакуючом стороном сут тепер жиды, котры мстят ся тепер за розстріл Бен-Йосуфа и за розстріл через арабов жидовского кольонисты.

Главным тереном борбы ест Єрусалим, где шмарено бомбу на арабский автобус и убито 3-ох арабов и 7-ох ранено, с тых послідных стан 5-ох барз опасный. Крім того в Єрусалимі пострілено одного араба и убито 2-ох арабов в жидовском кварталі. На границі Яффы и Тель-Авив убито двох арабских роботников, які робили в німецкой фабриці. В самом місті Яффа застрілено 6-ох арабов.

Склепы арабскы сут на знак протесту закрыты. Група арабской молодежи, котра ходила урядити манифестацийны походы, была через полицію росогнана.

Арабы со своей стороны ведут партизанску войну.

Власти оголосили на ново военне положене в Єрусалимі, Яффі и Тель-Авив. От 7-ой вечером до 6-ой рано не вольно никому выходити с хат.

Совіты приготавлиют ся до войны. Совіты приготавлиют ся поважно до войны с Японіом. Высылаюот они чимраз больше войска на Сибир. Концентрация совітских войск отбыват ся также в Вншней Монголии, где дотепер находили ся лем войска монгольскы, подкріплены специальными отрядами совітских войск. Тепер згромаджено ту пару брыгад кавалерии и змоторызованы отряды піхоты. На Далекый Выход высылат ся переважно войска с Украины.

Сонце причином выбуху пороховні. В положеної коло Букареста кріпості Афумати, мала місце в неділю вечером в пороховні експльозия, котрой причином были росогріты сильно сенцем бляшаны дахы. Бляха на дахах пороховні роспекла ся так от сильного сонца в часі пануючой там спеку, же спричинила выбух. В часі пару минут послідовала експльозия в двох инших будынках. В 300 метрах от пожара запалили ся крякы. На счастье в часі выбуху не было никого с людей близко пороховні и ніт жертв в людях.

Збіжал до Японии Лушков - Самойлович б. начальник Г. П. У. на Далеком Выході. Самойловича подозрівано в роботі против-сталинской и завозвано до Москвы. Але Са-

мойлович воліл выїхати до Японии и, як подают газеты, жие в Токио.

300 совітских достойников перед судом. В Москві выкрыто замах на жите начальника Г. П. У. Єжова. В звязи с тым выкрытем приступлено до масовых арештовань в самом Г. П. У. До тепер арештовано перешло 300 людей, занимаючих высокы становиска в совітских урядах. Всіх подозреных в справі замаху на жите Єжова поміщено в вязниці на Лубянци. Маюот они станути перед специальным трибуналом военным уж в найближшом часі. Всім грозит кара смерти. Буде то найбільшій процес, який был до тепер в Совітах.

В Москві кружат слухы также о том, же жена Литвинова ест арештована. Она походит с Англии и в послідных часах выступала протів Сталина. О ней говорят одны, же ест арештована, а инши, же ест розстріляна. Одно ест певне, же от 2-ох місяцов не было ей на нияком официальном принятю.

Кытайцы знова перервали таму на ріці. Як завзято боронят ся кытайцы перед японскыма наїздниками, свідчит факт, же недавно перервали они таму на Жолтой ріці и затопили пространства землі величины цілої Німеччины, а тепер зробили того само на ріці Янгтсе, лем бодай перешкодити дальшому посуваню ся японских войск. Воды с Янгтсе заляли барз важны стратегичны терены. Крім того через перерване там вода в нижней части рік обнижила ся так, же не могут по них плавати кораблі; о того именно ходило кытайцам, штобы унеможливити довоз войска, военных материялов и ідла для войска пароходами в глубину краю. Правда, войсковы кытайскы власти нанесли тым перерванем там величезны шкоды и кытайскому населеню, але там ест така заїлост и завзятка протів Японии же населене, позбавлене через затоплене даху, вступат до войска и иде бороти ся с наїздниками. Тоты нещастя не лем не ослабляюот духа кытайского населеня, але наоборот, они лучат и консолидуоот его протів их врага.

Пожар ліса в Тыличы. Через неосторожность роботников, рубаючих дерево, занял ся в Тыличы ліс, котрый росширял ся страшно скоро. Жертвом ліса пали лісы хлопскы и ліс камеральный. Шкоды выносят парудесят тысяч злотых.

В сяночком повіті появили ся волкы. В повіті сяночком, на границі ческо-польской в селі Черемха появил ся кырдель волков. Волкы нанесли значны шкоды, порываючы находячи ся на пасовисках бараны и овцы.

Комунальна Каса Ощадности Повіта Краковского в Кракові

Рок основаня 1882.

ЦЕНТРАЛЯ КРАКОВ, УЛ. ПИЯРСКА 1.
тел. 115-97, 131-73, 101-03.

Отділення: КРЫНИЦА, тел. 112.

ВЕЛИЧКА, тел. 6.

Всі порученя входячи в область банковости.

ПОРУЧЕНЯ ДЕВИЗОВЫ
ПОРУЧЕНЯ БИРЖОВЫ
СХОВОК АВТОМАТ.

СУМА ВКЛАДОВ ПОНАД 35.000.000 ЗЛ.
МАЕТОК ВЛАСНЫЙ ОКОЛО 6.000.000 ЗЛ.

БЕЗОПАСНОСТЬ.

ДОБРЫЙ ПРОЦЕНТ.